



EGUNEKO DIANAK




Koke Lasa-Iñaki Otxoa

Cho Oyuko gailurrera iritsi dira Koke Lasa gipuzkoarra eta Iñaki Otxoa nafarra. Badute, beraz, euskal mendizaleek berriro ere harro egoteko arrazoirik. / 21



Toni Morrison

Toni Morrisonen eskuratu du aurten Literaturako Nobel Saria. Jatorri afroamerikarrek idazle feministak Pulitzer saria irabazi zuen 1988an. / 23



Felipe Gonzalez

Espainiak jasaten duen krisialdi ekonomikoa «maiatzerako edo ekainerako» amaituko dela iragarri zuen atzo Felipe Gonzalez gobernuburuak, dagoeneko hamaika alditan egin duen legez. Jendea «krisiarekin obsesionatuegia» dagoela gaineratu zuen. / 35


Amaia Cardona: «Modelo lanean aritzeko oso garrantzitsua du norberak izakera»

IRUNE BENGOTXEA / OIARTZUN

Aurten 21 urte bete dituen oiartzuar honekin hitz egiten hasi eta berehala konturatzen zara modeloen inguruan dagoen mitoa, 'neska polita baina txoriburua' dioena, erabat okerra dela. Hasieratik utzi du argi bere bizitza pertsonalak eta bere izakera ez dutela zerikusirik modelo lanarekin. Horrezaz gain, azpimarratu nahi izan du elkarrizketa hau egiteko prest azaldu dela euskaldunok edozer egiteko gai garela erakusteko, «jende askok pentsatzen baitu modelo hori kanpoko gauza dela eta, jakina, euskaldunok ere egin ditzakegu horrelako gauzak». Euskal Herrian ez dago modelo «serio» asko eta hortik bizi ahal izateko kanpora irten behar izan dute.

Amaia Cardona bera ere Madrilén bizi da eta modelo agentzia batentzat egiten du lan, «baina ez nago modaren munduan sartuta, ez dut lagunik mundu honetan. Lanbide gogorra da, mesfidantza handia dagoelako, bakoitzak berea egiten duelako. Beraz, gauzak argi eduki behar dira eta nortasun handiz jokatu. Adibidez; ez banaute lan on baterako hartzen, ez diot garrantzi handiegirik ematen eta aurrera jarraitzen dut. Baina jende asko zapuztu egiten da, hau bere lanbidea duelako. Eta beraien artean berealdiko zerrikeriak egitera ere heldu izan dira, bata besteari zapatak ezkutatzera».

Modelo eskolak ez ditu beharrezko ikusten Amaiak. Berak ez du inongo eskolatan ikasi. «Eskola horietan ez litzatekeela inbertitu behar iruditzen zait, ikasi beharreko gauzak lanean hasten zarenean erakusten dizkizutelako. Nahiz eta eskolan



SOSLAIA

Beti musikan zentratua

Musika da Amaia Cardonaren gunea, beste gauza guztiak bigarren maila batean egongo lirateke. Pianoa ikasi du zortzigarren kurtsoa arte Donostiako Kontserbatorioan, baita kamarako musika ere. Madrileko hotel batean pianoa jotzeko aukera izan zuen, baina beste gauzekin batera eraman ezin zuenez, utzi egin zuen. Hala ere, musika ikasketekin aurrera jarraitzen du eta, horrez gain, aurten soziologiako ikasketak hasiko ditu Madrileko UNED Unibertsitatean.


pose asko ikasi, ez baduzu balio ezin duzu aurrera jo. Izakera ere oso garrantzitsua da eta ez da nahikoa gorputz polita edukitzea».

Bera kasualitatez hasi zen modelo lanean, ikastolako lagun batek Donostian desfile bat egingo zela eta jendea behar zutela esan zionean. Handik aurrera dendetakoak eta hasi zitzaizkion deitzen, eta horrela pixkanaka gaur arte. 1989ko Donostiako Moda Jaialdia izan zen bere lehenengo desfile serioa eta hortik aurrera lan garrantzitsuak egin ditu, Novia España Bartzelonan esaterako, edo Telefonica eta El Corte Inglés-entzako iragarkiak. Diseinadore garrantzitsuentzat ere lan egin du, hauen artean, Jesus del Pozo, Victorio Luchino, Loewe,...

Berak azaldu duenez, modelo lana ez zaio gogorra egiten beti beste zerbaitekin tartekatzen duelako. «Hasiera batean EBB eta UBI ikasketekin batera egiten nuen, ondoren musika ikasketekin eta gaur egun Euskal Telebistako Superbat programarekin tartekatzen dut». Aurrerantzean, beraz, Amaia Cardonaren aurpegia ezagunagoa egingo zaigu ETBko saio honetan 'Xakiren' pertsonaia antzeztzen duelako. «Nere lana ez da aurkezle arrunt baten egiten duen lana, egun bakoitzean gai ezberdina aurkezten eta antzeztzen dut. Pertsonaia hau gaztetxoek zuzendua dago, ez haurrei; horien ahizpa zaharrena izango nintzateke, nolabait azaltzeko».

Oraingoz Madril eta Oiartzunen artean izango da, programaren grabaketak modelo lanarekin batera eraman ditzakeelako. Aukera onak aurkezten zaizkion bitartean aurrera jarraituko duela adierazi digu».

irrimarra



© Jon Zabaleta

LERRO GUTXITAN

❑ «HITZAK EZER EZ DIRA, EPAILERIK EZEAN», adierazi zuen atzo Joaquín Ruiz-Giménez UNICEFeko Espainiako Batzordeko presidentek, eta nazioarteko erakunde bat sortzeko beharra azaldu zuen, 1989ko Umeen Eskubideen Konbentzioaren kontrako legehausteak zigortuko litzukeena. Espainiako alkateak Iruñean egiten ari diren 'Umeen Defentsarako Lehenengo Bilerak' izeneko jardunaldiak egin zituen adierazpenok Ruiz-Gimenezek.

❑ ERREPIDEZ BIDAIATZEA BAINO % 45 seguruagoa izango da Eusko Trenbideak-eko trenetan bidaiatzea 1996tik aurrera, konpainia honetako iturriek jakinarazi zuten. Izan ere, 10.000 milioi pezetako (455 milioi libera inguru) inbertsioa egingo du Eusko Trenbideak-ek segurtasun plan bat martxan jartzen. Juan Antonio Uriarte ET-FVko kontseilari ordezkariaren hitzetan, «Europako konpainia aurreratuen parekoa izango da gure trenetako segurtasuna».

❑ ALTSASUKO LANBIDE HEZIKETAKO Institutuaren auziari buruzko prentsa oharra kaleratu du Nafarroako Hezkuntza Departamentuak, eta euskararen eskaintza «oso zabala» dela dio, «legearen arabera eman behar dena baino franko handiagoa» eta inguruaren hizkuntz berezitasunekiko «errespetuzkoa». Bertako ikasleak greba mugagabea daude ikasketak D ereduaren egin ahal izateko, urtero izaten baitira arazoak.

❑ KILOMETROAK 93ko ZOZKETAN 1.395 zenbakiak eramango du Opel Swing 1200 autoa. Saritutako zenbakiaren jabeak Kilometroak 93ko antolatzaileekin jarri beharko du harremanetan. Bestalde, Juan M^a Agirre Arin billabonatarra suertatu da Irati komertzialak zozketatzen zuen motorraren irabazle.

ETA BIHAR

Poesia Eguna

Euskal Idazleen Elkarteak antolatuta, Euskal Herriko I. Poesia Eguna ospatuko da bihar, urriak 9, Donostiako Trinitate enparantzan arratsaldeko sei etatik aurrera. Berrogei poeta inguruk hartuko dute parte bertan, bakoitzak bina poesia irakurriko dituelarik. Horieta mordoska bat bildu eta gehigarri berezia osatu du EGUNKARIAK, bihar bertan kalera-
tzeko.

ONCE	
OSTEGUNA	
92.921	
ASTELEHENA	04.719
ASTEARTEA	86.904
ASTEAZKENA	01.557
OSTIRALA	KUPOITZARRA